

Ubat antimalaria mungkin buat jumlah pesakit di ICU menurun

Malaysiakini

07 April 2020

Annabelle Lee

KORONAVIRUS | Penggunaan ubat antimalaria di Malaysia mungkin menghalang Covid-19 daripada memburukkan keadaan sekali gus menyumbang kepada pengurangan pesakit di unit rawatan rapi (ICU).

Ketua Pengarah Kesihatan, Dr Noor Hisham Abdullah, hari ini berkata bahawa hospital telah menggunakan ubat hydroxychloroquine tanpa label sejak awal wabak itu dikesan di negara ini dan kesan sampingannya diawasi.

Ubat-ubatan antiretroviral atau HIV juga digunakan.

Katanya walaupun diberi amaran agar berhati-hati oleh Pertubuhan Kesihatan Sedunia (WHO), Malaysia membuat pilihan untuk menggunakannya kerana berada dalam keadaan terdesak.

Menurut beliau, hydroxychloroquine boleh menghentikan virus daripada menjejaskan pesakit sama ada dalam keadaan asimptomatik atau simptom

ringan Covid-19.

Kata Noor Hisham ubat itu digunakan bagi merawat malaria dan yang sangat berkesan mengatasi radang paru-paru.

Menjelaskan keadaan itu Noor Hisham berkata hydroxychloroquine berjaya menghentikan virus Covid-19 daripada merebak lebih buruk dalam badan pesakit.

Penggunaan ubat itu, katanya, menyebabkan keadaan pesakit tidak menjadi lebih serius sehingga memasuki kategori empat atau lima.

"Jadi dengan itu kita rasa ubat itu dapat membantu dr segi (mengatasi masalah) radang dan mengurangkan jumlah pesakit dimasukkan ICU atau memerlukan bantuan penafasan

"Kalau kita lihat sekarang, mereka yang masuk ICU lebih kurang lima peratus saja berbanding 10 peratus di negara lain," katanya.

Untuk rekod sehingga jam 12 tengah hari tadi, Malaysia mencatatkan 3,963 kes positif berbanding 1,321 kes pulih, termasuk 80 yang terkini.

Jumlah pesakit yang ditempatkan di ICU pula seramai 92 orang dengan 50 daripada mereka memerlukan alat bantuan pernafasan.

Copyright © 1999-2012 Mkini Dotcom Sdn. Bhd

Source: <https://www.malysiakini.com/news/519387>